



Kabarett „Sachsenmeyer & Co.“  
09224 Chemnitz  
Feenweg 11

Hauptspielstätte:  
Kabarett-Kiste (im Hedwigshof)  
An der Markthalle 8  
09111 Chemnitz

Bestell-Telefon: 0371 - 694 77 11  
[www.sachsenmeyer-kabarett.de](http://www.sachsenmeyer-kabarett.de)  
e-Mail: sachsenmeyer@t-online.de

## 6. Kalenderwoche – ab 9. Februar 2009

# Währ had, dähr had!

Nochma vonweeschn Griese un so! So langsam dud ja immor mähr rauskomm, dass das viele Geld, was da fleedn gegang is bei de Bankn, dass das gahr nisch rischdisch weg is! Es dud ooch welsche gähm, bei dähnen had sich das Geld angesammlt! Offm Kondo!

Naja, Sie kenn ja ooch dähn alden Schbruch von dähm Anlacheberador in Ihror Bank: Abor nein, Herr Meyor, ihr Geld is doch nisch weg! Nein! Es is bloß auf einem andoren Kondo!

Un das dud eim dann doch e biß dreesdn - dass das scheene Geld nisch weg is, sondorn ehm bloß woannersch.

Dass die, womeeschlich ma was zuriggähm missn, die, wo sich das Geld aungesammlt had, off die Idee dud abor keenor komm. Bei Reischduhm dud die Reeschl geldn - währ had, dähr had! Un wenn das Geld noch so dreggsch is - von dunkle Geschäfte odor Beschiss... dähm Geld dud mor das ja nisch ansähn! Nee, wenn das Geld eema gewaschn is... villeischd noch e biß Weißmachor dazu... dann brauchdsde das nie zuriggähm! Dann kannsdes fiehr disch arbeidn lassn!

Na, wo däd mor denne ooch hinkomm, wenn alle ihr Geld zuriggähm missdn, die wo ihr Geld nisch ährlisch zusammengeschbard hamm! Das rischdisch viele Geld, was mansche hamm, das kannsde ja gahr nisch off ährlische Ard zusammshbarn! Das dud nisch gehn!

Dähr ganze Reischduhm von dor Gwiehn in England zum Beischbiel, das hamm ja damals de Seeräubor zusammengeklaud. Dähr Reischduhm vom Faddikahn in Rom, dähr is ooch nisch bloß ibor dähn Ablasshandl zusammgekomm. Odor das von dähm Berlusgohni? Un wo is eischendlich das

ganze Geld gebliehm, was de Judn ma haddn, bevor se nach Auschwidz mussdn?

Ibrischens - geeschn die großn Vormeeschn, dies in dor Weld gähm dud, da is ja das bißl SED-Vormeeschn e Lachor gewähsn. Mor kennde nadiehrlich ooch sachn, die SED-Bonzn warn sogahr zu bleede dazu, sisch de eischnen Daschn zu filln! Nascha, Schwamm driebor.

Jednfalls kenn mir uns jedzde in dor Finanzgriese werglich dadermid dreesdn, dass das viele Geld nisch eenfach weg is! Nee, das is noch da un dud villeischd ooch irschendwo ma widdor offdauchn. Wenn ooch villeischd nisch direggd off Irm Kondo... abor villeischd dud sisch eenor mid dähm Geld, was jedzde weg is, unorn Gemnidzor Fußball-Glub koofn. Un dann schbieln mir irschendwann sogahr in dor Schembjenslieg mid! Wie Schellsi London!

Nee, odor das Geld dud woannersch offdauchn. Mor duds dann abor wahrscheinlich nisch widdor erkenn, ooch wens ma offm eischnen Kondo gewähsn is. Villeischd söllde mor sisch die Nummorn von die Geldscheine offschreim, die mor offs Schbarbuch bring dud, dann kennde mor die villeischd schbädor widdor erkenn. Abor wenn isch dann zum Beischbiel zu so eim Ölscheisch hingehn däde, un sachn däde, hier die zwee Hunnordor, die sinn ma meine gewähsn! Ob dähr mir die dann zuriggähm däde? Nee, währ had, dähr had, däde dähr sachn! Beschdimmd!

**Eduard Sachsenmeyer**